

靖

海

志

靖海志卷三

海鹽彭孫貽羿仁氏著

己亥順治十六年

正月成功駐沙關 二月成功到磐石衛 三月成功

催各提鎮限本月二十五日到磐石聽令 四月二十

八日成功率將士齊到定關二十九日入寧波港 五

月初一日成功抽兵下船 初四日至舟山烈港 十

七日成功至羊山諸將請先取崇明以為老營成功不

許 十八日成功至崇明 十九日成功差監紀劉澄

密書通江南提督馬進賢 六月十四日成功合張煌
言諸軍至焦山 十六日辰時成功集諸將議曰瓜鎮
為金陵門戶宜先破之成功進兵攻瓜州我探江都御
史朱衣佐率遊擊左雲龍領滿漢兵數千扎營城外迎
敵成功迺令右提督馬信前鋒鎮余新進奪譚家洲崎
左右武衛居中中提督居左左提督居右後提督抄小
州之後兩陣相對隔一小港銃矢交擊成功令材官張
亮督善泅水者蓋舟斬斷滾江龍揮兵大進滿兵列火
銃守岸左衛鎮周全斌揮兵下水直渡小港水深鐵重

兵從水底行沒頂多溺死突上岸守兵不意海兵至驚駭全斌直衝其陣左雲龍及右協楊富率兵會戰背而軍戰未合雲龍已陣斬十餘人全斌率兵直抵城下諸軍直逼而進滿兵退入城城正兵鎮韓英乘勢奪梯奮力先登左先鋒楊祖繼進城遂破已時遂克瓜州左雲龍陣歿朱衣佐被擒斬首數千是日右提督馬信攻奪譚家洲大砲張兵官羅蘊章等攻滿洲木城三座木城用大杉木板釘平豎柵內容兵五百人大礮四十門火藥火礮不計其數從上流壓下船過之立碎至是殲焉

成功以全斌輕渡港失兵多欲斬之諸將跪請乃許戴
罪立功朱衣佐至鎮江乞歸養親成功賜路費遣之以
援勦後鎮劉猷鎮守瓜州監紀柯平督理江防管州事
委張兵部楊戎政督水師入蕪湖牽其戰船直逼金陵
以分其勢 十九日成功督師進泊鎮江南岸七里港
二十日登岸扎營時我提督管效忠以步兵駐守銀
山海師扎於銀山對面山上相距只隔一港滿洲騎兵
驚移大路扎營留綠旗兵數百守銀山成功於二十二
日二更移營到銀山下寅時傳令登山開隊以銀山迫

府治先爭地夜引兵奪之遲明大軍分五路三疊壓壘而軍海師日逼鎮江告急副將高謙守鎮江江南總督卽廷佐檄吳淞提督馬逢知以兵赴援滿帥哈哈木發滿兵一千援鎮江逢知將騎兵三千至丹陽聞成功兵盛返旆淞江三檄不至副將高謙將兵二千懼不敢戰援勦林副將將閩兵二百五十人跳蕩敢戰海師益逼林副將曰我輩赴援至此閉城不戰何以拒敵請以所部為諸軍先開西門出戰高謙以兵繼之閩將揮兵奮勇陷陣入海師營擊殺數百人成功親督右武衛周全

斌左虎衛陳魁等四面圍之周全斌直衝其鋒以長繩
介陣後曰兵退至繩者斬於是奮勇爭先滿兵披靡諸
將繼之林副將血戰部曲殺傷過半僅餘七十餘人決
圍出高謙不戰而走時西門道狹止容一人一騎且滿
港甚多自相蹂踐死者不計其數後軍阻於道狹不能
進故敗退入城明日合滿漢兵復戰漢兵居前烏槍弓
矢待敵海師火器先發鼓鳴我師皆伏地聲畢皆起海
師發火筒煙眯目不得開煙過海師已短兵接烏槍弓
矢不得施刀擊膝盔牌皆不入大敗走海人逐之盡奔

都事蔡政往蘇松通好提督馬進寶約其同時會師馬
信齋書於崇明總鎮梁化鳳化鳳許納約下金陵後即
納版圖江南提督管效忠調集各府兵將齊備講欲
衝營成功舟師營江上戰士登陸逼城為營因山樹柵
環金川神策儀鳳三門城中震恐文武將吏皆懷二三
唯哈哈滿州木總督郎廷佐提督管效忠堅持戰守飛
章告急成功逼城大造望樓衝車羅將軍自廣班師至
明愛達里自浙至援師漸集江上見成功兵盛不敢戰
廷佐檄調崇明總鎮梁化鳳入援化鳳將步騎各三千

至江寧哈哈木令屯江上見梁兵戰馬雄壯令兵奪之
梁兵洶洶思叛管效忠言於哈哈木曰江廣援師既敗
外援已斷唯化鳳一軍遠赴危城謂必有以慰勞之奈
何奪其戰騎乎軍心苟變為禍彌速矣速犒之歸其馬
哈哈木即命效忠勞化鳳軍歸其馬開城納江上兵成
功也嶽廟山上軍容甚盛廷佐集滿漢諸將議出戰滿
兵懼諉候 旨進兵化鳳曰必待命而戰賊已逼城人
心一變大事去矣廷佐廼嚴整部伍刻期待戰 十七
日甘輝請成功速攻城恐援兵日至師老無功成功定

於二十二日安礮進攻 二十一日成功營將闕尚賢
犯令當斬夜亡抵金川門縋而入盡以營中虛實告城
中曰營中令雙日盡解甲明日又成功生日諸將上壽
必置酒若欲破敵不出此日營中地雷伏弩大礮長槍
隨鹿角以密布無隙可入必從中而起出不意始可敗
之郎廷佐集諸將謀曰成功營抱三門中央神策門自
明初塞之近三百年鑿之出兵直搗中堅彼自潰矣昧
爽穴神策門去其土石梁化鳳以所部五千人為前鋒
闕尚賢導之升屋踰垣直入前鋒余新營新兵不及甲

而戰舉火焚營火器迸發傷一二百人化鳳兵大呼奮
擊營中大亂生擒余新蕭拱辰泗水而逃全軍覆沒後
提督萬禮扎於橋外救應不及滿兵見漢兵勝其氣亦
倍遂蜂擁出城外扎營 二十二日晚甘輝林勝以金
陵守禦既固恐難猝振勸成功收兵回至觀音山成功
欲再決一戰令楊祖姚國泰楊正藍衍等扎於山上甘
輝張英等伏於山中林勝陳魁等列於山下成功督陳
鵬萬祿等扎觀音門為聲援萬禮萬義等堵禦大橋頭
大路馬信吳豪韓英由水路攝其後黃安專督水師防

江 二十三日滿漢兵大隊抄出山後直衝左先鋒楊祖之營楊祖兵盡藤牌就地滾殺化鳳用棗木大棍槩以棒之執藤牌者亂倒於地棄甲曳兵而走時成功傳令無令不許輕戰而山上山下又隔遠不相聯屬我兵矢發如雨楊祖衆寡不能當而走藍衍戰沒成功遣陳鵬萬祿往援山高不得上滿兵從山後出其背前後夾攻甘輝張英等在上山被圍力戰不得出張英陣亡甘輝且戰且走至江擒馬林勝陳魁在山下戰敗全軍俱沒萬禮等在大橋頭滿漢兵首尾合圍萬禮東西馳哭不

得出亦被擒焉萬義泗水而逃成功見大勢已去扶創
收兵下船順流返京口滿漢水師艤集共追成功成功
揮黃安大礮禦之擊沈數艘渡載諸眷姬及諸殘兵出
港成功查失將領中提督甘輝後提督禹禮五軍張
英親軍林勝陳魁鎮將藍衍魏標卞世用副將洪復并
戶官潘庚鍾儀衛吳賜等數十人後甘輝等解至金
陵總督固山會審萬禮余新皆跪甘輝以足蹴之曰痴
漢尚欲求生乎大罵不屈俱被殺海師之入長江也
大江南北無不爭先獻冊上印南及徽寧西及九江俱

遙通款禁中聞風思動兩浙人心搖搖將吏坐觀向背
滿兵望風退縮不敢爭鋒江南巡撫棄句容走丹陽築
堰自守報至北京舉朝驚駭諸王固山議出師遂巡莫
敢任 當寧決計親征召前海澄降將蘇明問之對曰
海兵不能持久不數日當有捷音後三日而江寧報捷
至乃罷 二十四日成功至京口察戰士瘡傷者療治
之分派各鎮補缺管轄令五軍都督忠明伯周全斌將
甲士五千人鎮江列營待戰追者不敢逼 二十八日
諸將領俱各下船駕入長江成功徐發鎮江所寄家口

載舟中高謀及諸武生主款者盡攜家口從之將發大掠城中乃行載糧數十萬石出焦山口張煌言將舟師屯巢湖身率親信數百人登陸招撫各邑聞成功敗舟師全軍東下乘風順流過三山無敢撓其鋒者遂出鎮江口煌言間道走山中宵行倍道自廣德趨獨松關渡餘杭至台州下海八月初一日成功率師回至狼山上沙初四日成功泊吳淞港遣蔡政往見馬進寶入京議撫初八日成功至崇明以作者營先是梁化鳳以海人連敗出海必攻崇明以抒憤連夜提師返崇明

十一日海師攻圍甚急城崩數丈適梁化鳳兵至內
外夾攻海師大敗正兵鎮韓英監督王起鳳雲梯登城
俱被礮傷死成功欲令諸將再攻周全斌曰城小而堅
難以驟拔得之亦無用適馬進寶差中軍同蔡政來勸
退師以待奏請看撫局成否成功從之仍遣蔡政注京
十八日成功回師至浙江以楊富管正兵鎮分派各
提鎮就溫台舟山各港口屯扎操練仍撥數鎮屯扎秦
嶼三都興化南日沿海地方九月初三日成功令開
船初七日至思明州十月援勦後鎮劉猷屯溫州深

入內地取餉被誘戰沒 十二月蔡政自京回云撫事不成繫同安侯鄭芝龍於獄并逮馬進寶到京問罪遣滿洲將軍達素帶披甲萬餘前來勦海并令三省水師會勦

庚子 順治十七年

正月二十一日報滿洲統兵將軍達素頭站兵至福州 二月成功調回南下諸提鎮候撥防守 三月將軍達素到泉州催促船隻配兵成功調回南下各兵分派屯扎 四月初三日成功改右提督馬信爲提督軍號

騎鎮傳令各提督將士春口搬住金門所委英兵鎮陳
瑞保護同戶官鄭泰一同管轄 初四日遣中衛鎮蕭
拱宸等泊崇武堵禦泉港委輔明侯林察為水師總督
共商機宜派援勦右鎮林順禮武鎮林福防守海門派
右武衛周全斌驍騎鎮馬信防泊裂嶼尾派遊兵鎮胡
靖殿兵鎮陳璋為陸師守高崎等處援勦後鎮張志為
水師拋泊高崎應援撥林福防守倒流寨 二十六日
泉州官船二百餘號駕到祥芝澳陸師山上扎營放礮
水師依山邊而行遂進至圍頭成功令林察蕭拱宸等

海劉五店遏止圍頭官船不得入同安港會合命行戶
官鄭泰將前派守圍頭兵丁船隻一盡防守金門拋泊
城保角以防廣海許龍等船 成功撥右虎衛陳鵬守
五道高崎東一帶撥援勦前鎮戴捷守高崎寨殿兵鎮
陳璋前衝鎮劉俊智武鎮顧望忠防守蠓保寨并赤山
坪遊兵鎮胡靖防守東渡寨仍委戎政王秀奇總督高
崎等處協理戎政楊朝陳總督東渡等處臨期酌調
遣 成功令神武營康邦彥北崎尾兼管神前一帶檢
校後鎮吳蒙後衝鎮黃昭援勦後鎮張志并陳廣吳

裕水師應援高崎五道等處堵截邀擊 五月初一日

成功駐演武亭撥忠靖伯陳輝同安侯周瑞援勦右鎮
下楊元標統船前提督下方左營等船泊海澄港以截
漳州大隊水師 成功親督前提督黃廷右武衛周全
試援勦左鎮黃昌右鎮林順正兵鎮楊富等屯海門準
備迎敵 初八日漳州港中先造大船一百號配滿兵
總督李率泰海澄公黃梧督之出海澄港同安港收拾
小船將軍達素同同安總鎮施琅以小船配滿兵橫渡
高崎俱下船約初十日進發 初十日早成功令五軍

陳堯策傳令陳輝等碇海中流不許起柁欲待漳州船出而乘其後倏忽間官船乘風蔽江而下以數船攻一船用鐵鍊牽住礮矢齊發梯而登陳堯策周瑞一船及方左營一船皆被燒死陳輝一船官兵蜂擁而上輝走入官艙發火藥從下衝上船艙飛裂官兵在船上俱死其船未沈為海兵奪回陳輝得活時成功坐煩船繼令何義督之而下八槳船往來督戰時官船乘風直追海船漸漸退縮直壓至廈門港日將午南風乍發海潮漸長黃廷周全斌等奮力迎擊同正副龍煩兩船破艀而

入龍煩受大彈子一丸重十餘觔小彈子一斗副龍煩
照樣新鑄者各以一船專載之龍煩所及船中人頃刻
間不見形影遂奪滿先鋒昂邦章京紅眼二船出擒侍
衛一二等蝦十餘員并烏沙一船黃廷擒梅勒耿勝一
船戶官鄭泰自金門率烏船五十號乘勢衝入宣毅鎮
黃元從鼓浪嶼後衝出夾攻礮聲如雷隱隱不絕火煙
迷江咫尺不辨共擒官船十三號又追滿先鋒三船至
主與滿先鋒棄船登岸馬信招之降夜溺殺之惟留紅
帶梅勒士心秀併隨身披甲三人是日辰時達將軍總

督滿漢兵船至牟尼嶼從赤山坪登岸殿兵鎮陳璋揮
兵於水中逆戰兵少漸不支守高崎右虎衛陳鵬密通
我同安總鎮施琅謀為內應其副將陳蟒璋之姪也見
勢急欲出兵救援陳鵬止之不許成功總督王奇序速
令陳蟒赴之滿兵見金龍甲兵至以為迎已也及下水
砍殺始慌亂而前協萬宏領兵林雄領旗協劉雄繼至
合擊前衝鎮劉俊亦從東衝出協力拒敵俄而水師兵
衆趕至滿船向前迎敵諸水師分路衝下擊沈數隻滿
兵先登岸者被殺及溺水不計其數生擒呂馬刺及彼

甲三百餘之皆斷手掌放回達素率全師回省數日屍
浮海岸萬餘長髮者十二三短髮者十七八 成功磔
陳鵬殺其家屬以陳蟒為虎衛右鎮何義為虎衛左鎮
六月成功駐金門後埔令思明州將士兵丁眷口移
住金門百姓搬移過海聽其自便撥諸提鎮分扎汎地
取糧 七月成功命兵官張光啓往倭國借兵以船載
黃蘗寺僧隱元及其徒五十衆時倭人敦請隱元故載
與俱往成功書與倭國王而不及上將軍主國政者故
倭人兵不發 九月諸兵民家眷俱回思明州 十月

中朝調達素回京問罪達素在福州聞之吞金而死滿
兵回京水師船隻俱調入港閭岸 監國魯王殂於金
門所

辛丑

順治十八年正月
元為康熙

世祖晏駕

聖祖即位改明

正月成功議取臺灣臺灣首在東南海中東倚山西薄
海北界雞籠城與福州相峙南則河沙磯小琉球近焉
周袤三千里與土蕃雜處萬山環抱中有膏腴平地數
百里當數縣故無君長饒布粟桑麻百物互相貿易山
多金銀無所用人民饒樂不知甲兵戰鬪山口百里皆

危礁兩山夾水如永巷潮長舟輕始可入天啓年間鄭芝龍與羣盜出沒其地後為歐羅巴紅夷所占於港口築城與中國日本廣南貿易海邊貧民流寓者種蔗煮糖為業殆數千戶時紅夷亦恐鄭氏動兵及庚子春先遣通事何斌及其酋長同來議貢何斌密進地圖盛言臺灣富饒為四省要害且言可取狀成功陳兵自閩南關至院東依山佈陣凡十餘里甲兵數萬周全斌統轄戎旗兵七千皆衣金龍甲軍威甚盛夷人震懾成功欲進兵諸將雖不敢違俱有難色宣毅後鎮吳豪曾到其

地力言港淺大船難進且水土不服多瘴癘成功不旋
惟協理戎政楊朝棟倡言可取成功納之 二月成功
駐兵金門整理船隻以兵官洪旭前提督黃廷居守思
明州戶官鄭泰居守金門所 三月初一日祭江成功
督文武官親軍武衛周全斌何義陳蟒提督馬信鎮將
楊祖蕭拱宸黃昭陳澤吳豪林福張志等作首程先行
令守澎湖遊擊洪暉引港各船俱駕到料羅灣聽令開
駕 二十二日午時成功自料羅放洋 二十四日各
船齊到澎湖分各嶼駐紮成功扎營內嶼 二十七日

開船到甘吉嶼阻風而回 三十日晚風雨未息成功
以行糧已盡傳令一更後開駕三更後晴霽風順 四
月初一日天明成功至臺灣外沙線各船絡繹俱至到
鹿耳門線外此港甚淺沙壘重疊海道紆折僅容數武
大船從無出入故夷人不甚防備是日水漲丈餘成功
令小船由鹿耳門登岸午後大小戰船齊進泊水寮港
登岸扎營令陳澤督虎衛將坐銃船扎營耳門牽制紅
夷甲板船并防北線尾守赤嵌城夷長貓難實叮發礮
死學營壘并焚馬廐倉粟成功恐焚及赤嵌衛令楊朝

棟督張志統兵防禦 初三日陳澤扎營北線尾守臺
灣城夷長揆一見海師未齊遣頭目拔鬼仔率島銃兵
數百直前邀擊陳澤迎戰一鼓殲之拔鬼仔戰死餘夷
退走 初四日赤嵌城夷長貓難實叮以孤城救之成
功遣楊朝棟招諭之遂率夷人三百餘人出降 成功
令赤嵌夷招夷長揆一等來降不從時夷人尚有甲板
船在港令陳澤陳廣等攻之沈其一隻焚其一隻走回
一隻 初四日成功督師移扎七崑身以逼之築土臺
架礮攻臺灣城揆一等於附城銃城齊放大銃項刻上

臺崩壞海兵退回夷人出城奪礮馬信劉國軒率弓箭
手射之乃退成功遂令赤嵌降夷架銃擊其銃城崩之
派馬信等扎臺灣衛固守不攻俟其自降成功又使人
告之曰此地乃先人故物今我所欲得者地耳餘悉以
歸爾紅夷乃降 成功派各鎮分扎汎地屯壘 五月
初二日二程黃安劉俊顏望忠陳瑞胡靖陳璋等到臺
灣 成功集文武各官審宣毅後鎮吳豪搶奪民財東
匪朱粟新之右虎衛陳蟒同罪革職網責以黃安管右
虎衛 成功既得臺灣制律法興學校改臺灣為偽安

平鎮亦巖城為偽承天府委楊朝棟為府尹一為天興
縣委莊文烈知縣事一為萬年縣委祝敬知縣事 六
月十六日銅山守將蔡祿郭義搶掠居民脅忠匡伯張
進投誠進詐許置酒請會欲發火藥與之俱焚蔡郭知
之不赴張進遂縱火自焚初後提督萬禮密約海澄公
黃梧欲據思明州投誠後隨攻南兵被獲而死已祀忠
臣祠矣事洩成功撤其木主蔡郭是其黨也故懼而叛
大兵入銅山城兵官洪旭曾忠勇侯陳豹統水師追之
蔡郭同大兵退走報至成功拔總監營翁天祐鎮守而

厚恤張進之家 七月紅夷會甲板船至成功調右武

衛前協裴德協守臺灣 張志黃志等激變大肚社土

番楊祖與戰中標鎗死土番圍張志營黃安陳瑞等擊
走之 八月紅夷率甲板船來攻成功令陳澤同戎旗

左右協水師擊敗之獲甲板二隻小艇三隻自是甲板
退入臺灣港不敢復出 朝命戶部尚書蘇納海至閩

遷海遷居民之內地離海三十里村社田宅悉皆焚棄

先是達素兵至成功令思明州撤空其北人來降者家
眷乘隙皆渡海逃去成功右提督王秀奇亦逃回江南

靖海志卷三

埋名不出而原任漳州知府房星暉者為索國勇門客
遂逃入京使其弟候補通判房星曜上言以為海兵皆
從海邊取餉使空其地而徙其人寸版不許下海則彼
無食而兵自散矣遂從其策陞房星曜為道員病死無
嗣至是上自遼東下至廣東皆遷徙築短牆為界碑廢
兵戍守出界者死百姓失業流離死亡者以億萬計蘇
納海歸薦同安總鎮施琅為水師提督移鎮海澄十
月同安侯鄭芝龍為其家人尹大器出首通海時
今上親即位四輔蘇克薩哈與芝龍有隙以初三日日

磔芝龍於菜市殺其子孫家屬凡十一人囚鄭芝豹於
京師錮守之報至臺灣成功叱為妄傳然中夜悲號店
常鬱悵 十二月守臺灣城夷長揆一等乞以城歸成
功而搬其輜重貨物下船率餘夷五百餘眾駕甲版遠
去成功遂有臺灣改名東寧成功以各社田土分與水
陸諸提鎮而各令搬具家眷至東都居住兵丁俱令屯
墾初至水土不服瘴癘大作病者十之七八死者甚眾
加以用法嚴峻果於誅殺府尹楊朝棟以其用小斗散
糧殺其一家又殺萬年縣令祝敬家屬發配於是人心

惶懼諸將解體

壬寅康熙元年 海上稱永歷十六年

正月成功嚴諭搬眷鄭泰洪旭黃廷等皆不欲行於是
不發一船至臺灣而差船來調監紀洪初闢等十人分
管番社皆留住不遣島上音信隔絕 三月成功令周
全斌調銅山思明州兵攻南澳欲擒陳豹豹短小精悍
號三尺陳守南澳近二十年許龍蘇利皆畏之但驕傲
專恣數違藩令兵至倉猝率衆搬眷下船不敢十分迎
敵揚帆入廣東投誠朝命封為慕義伯未幾病盲而死

四月成功先有寵妾董夫人在思明州長子經胤之
生子子生報臺灣成功大喜高宴累日間所自出皆云
不知既而微知之大怒命工官楊都事齎金箭到思明
州欲殺董夫人及長子經并左右五人首洪旭經妻父
也黃廷與洪旭密謀國姓以盛怒命殺其子國姓無他
子倘後而中變喜怒不可知不若姑緩之須後命遂殺
楊都事不奉令又訛傳周全斌奉密諭欲殺諸將十餘
人於是人人自危洪旭等候周全斌船回廈門港即執
而拘之黃廷勸鄭泰殺全斌全斌求救於黃夫人洪旭

亦依違乃得免 五月初八日成功病卒於臺灣遺命
子經不肖不堪負荷文武各官俾輔幼弟為臺灣主提
督馬信鎮將黃昭等宣遺命以其弟鄭世襲護理大將
軍印未幾馬信黃安皆物故世襲以黃昭蕭拱宸為腹
心拔劉國軒管鎮事謀自立報至思明州鄭泰洪旭黃
廷工官馮澄世襲軍祭鳴雷等皆不從立鄭經為副討
世子發喪即位 時靖南王耿繼茂移鎮福建與總督
李率泰遣中軍王明賞功李有功至思明州議撫鄭泰
等議照朝鮮例冠帶不雜髮復耿李使疏請而泰遣中

軍官楊來嘉同入京待命後不報釋楊來嘉曰 八月
京中差戶部郎中賁岱兵部郎中金世德入閩安城招
撫凡海中文武官投誠者依例照品級升降補用 十
月洪旭鄭泰等以兵千餘人配船送鄭世子入臺灣鄭
經以周全斌為五軍督馮錫範為侍衛澄世子陳永華為
諮議恭軍至澎湖世襲將李思忠乘船至臺灣知諸將
有謀逃回鄭經隨即防禦因乘風入鹿耳門登岸全斌
令連夜伐木為寨扎營次早黃昭蕭拱宸謀奉世襲拒
經值大霧晝暝咫尺不相見諸將多迷悞失期惟黃昭

兵先至攻其前周全斌獨拒之劉國軒督兵力戰破營而入鄭經兵却擠而前黃昭攀木而登為流矢所中墮下全斌令斬其首大呼示衆軍士皆迎降大霧忽晴日已向午鍾宇等至皆反戈而迎鄭經入安平鎮請世襲至待之如初世襲委罪於其僕蔡雲雲自縊鄭經收蕭拱宸李應清曹從龍等斬之餘皆不問諸將營兵撥守汎地如故十一月鄭經率周全斌等同其叔世襲回思明州後世襲入京歸命授精奇尼哈番顏夫人鄭世襲自戍所發回準在京同住

癸卯康熙二年

正月鄭經駐思明州時洪旭守思明州鄭泰守金門黃廷守銅山鄭經得鄭泰與黃昭往來書欲襲取之鄭泰不自安稱病不出張煌言黨偽靖波將軍阮美率文

武各官詣溫州投誠浙督趙廷臣以聞三月鄭經命

周全斌督戰入海澄港取糧欲襲金門見其有備乃止

四月叅將陳永華謀以鄭經將回東寧而請鄭泰為居守戶官統轄諸鎮資其餉給兵鑄居守戶官印遣協理吳慎齋至金門泰遣其弟鳴駿入謝鄭經慰諭之見

陳永華鳴與駿情好甚密鳴駿回永華力勸其行泰遂於六月初六日帶兵船并餉銀十萬至思明州是晚入城赴席鄭經以其前通書黃昭面質之遂交與洪旭監留周全斌率兵并其船獨蔡璋一船得脫天未明至金門鳴駿倉猝與泰之子縉緒率諸將及兵丁眷口下船入泉州港向總督李率泰投誠船凡二百餘號兵八千餘全斌等追之不及後京中封鳴駿為遵義侯縉緒為慕恩伯文武官吏班賞叙用有差 初十日鄭泰見其子弟家眷兵衆皆入泉州港遂自縊而死 七月鄭經

以黃而輝為思明州知州黃廷之子也 蘇利反叛二

十七日朝命兵部侍郎碩圖郎中沙海正黃旗副都統
木克必免刑部郎中希福往廣東征蘇利 廣東總督

盧崇俊奏報八月十二日兵至南塘蘇利親領萬眾迎
敵平南王尚可喜合兵擊之賊始潰散將軍提督督陣
賊屍滿野官兵馳圍碣石賊夜開門潛遁我兵搶門而
入提督兵丁李起鴻陣斬蘇利驗明投誠員役認項項
項有疔疽是實臣捐銀三百兩馬一匹袍帽緞疋賞之
以示鼓勵蘇利家口先期出城下海遞去 黃廷自銅

山入見鄭經慰諭之海自中鄭鳴駿入泉州人心解體鎮將多叛右武衛楊富左武衛何義精忠伯陳輝等文官叅軍蔡鳴雷禮官都事陳彭等皆先後投誠九月荷蘭國王糾集甲版船十六隻番兵數千會靖南王耿繼茂總督李率泰約共攻兩島候事定之日欲求活嶼築城貿易如廣東香山濕例後事納貢互市李率泰遂議平島十月調齊水陸官兵陸路提督馬得功督鄭鳴駿以船數百號出泉州港水師提督施琅同海澄公黃梧出海澄港靖南王耿繼茂同荷蘭國王扎營於同安港

之劉五店至期下船渡海守高崎正兵鎮陳昇先約降
尚可喜奏十月二十二日蛋賊李榮周玉稱奉永歷
勅印號恢復粵將軍直犯廣東省城臣隨同撫提二臣調
令現在船隻前往擊賊周李二賊揚帆遁走礮船追襲
八十里至魚珠纜尾海面賊援已至與兵船對敵地多
沙淺賊乘上風順水燒哨船三艘船十及水師舟一募
夜收兵二十三四日賊船東西搶掠二十五日賊攻順
德縣南門捆知縣王允下船賊懸張偽示沿海鄉村為
其造船二十八日臣據鎮臣張國勛報會同密遣擺牙

喇恭領劉國保統馬步兵一千協鎮將軍標下甲兵五十提督甲兵五十八擒燒村寨船隻臣密諭鎮臣張國勛班際盛統領戰船水陸並進三十日周李二賊率船一百二十三迎敵鎮臣張國勛恭領劉文煥兩鎮各營游擊薛成亮等提標游擊苗英等統頭敵戰船直前衝殺左翼鎮臣班際盛協鎮將軍左鎮王運昌水師游擊張友才恭將劉光宗提督守備文自炳等統二敵戰船鈔出夾攻自午至申飛跳賊船擒斬賊衆拋擲火罐焚燒賊船各賊踉蹌落水馬兵往燒村寨從大石海旁邀

擊奔岸之賊盡殲焉劉文煥生擒偽妖粵將軍周玉奪
回扭鑲知縣王允本標官兵生擒偽軍師林輔并周玉
母梁氏各標共擒賊二百七十人獲賊大船二十四快
船二十八鐵盔甲綿甲七百四十一大礮班鳩子母三
眼百子鳥槍四百六十九虎叉大刀槍藤牌一千九百
一十六大藥五十鐔燒賊船六十四斬首二千六百三
十七遁去三十餘舟劉國保統步騎至市橋陸路賊放
礮對敵礮傷甲兵馬足我兵奮力追勦賊逃至河邊潮
田泥淖步騎難前斬首二百三十四級焚燒已未成大

小船隻一百三十一隨收兵大石海旁見水師方與對敵夾攻逃岸之賊盡行勦殺粵東環圍皆水兵船不過七十陸兵盈萬勢難飛渡逆首李榮夜遁必將糾合復來逆船尚多未可輕視伏乞亟造船戰以收緩急之用

靖南王耿繼茂統陸兵趨濟尾總督李率泰統陸兵次嵩嶼提督馬得功統泉州各標水師自圍頭進提督施琅統漳澄各標水師自海門進十月初二日繼茂先發旗下都統王大用暨章京夏有功等將步騎自泉州發別遣駐防漳州左翼總兵徐成功右副都統江元勳

等自漳州發初五日兩軍俱次漳尾對廈門高崎鄭經
率黃廷周全斌等立營對海荷蘭國船高而且大一船
有大小礮銃千餘號橫集中流為耿王李總督藩叢賊
望見我師駕遊奕數十艘礮擊我營營中亦發大礮擊
賊舟初六日午時鄭經周全斌統大船往來轉戰礮攻
我營我兵發礮相持初六日晚賊精銳千餘乘夜潛渡
登陸直逼游擊史定國營大器弓矢並發向營盤垛口
槍刀砍刺定國帶甲兵殺出營門都統王大用督兵策
應刀箭砍射礮傷落水賊無數奪盔甲十一副火筒噴

筒二十餘賊敗奔舟走經艖引去餘舟仍扎高崎島山
立營靖南王耿繼茂督發泉州閩安水師及藩旗都司
陳一明將甲兵六百又投誠同安伯鄭鳴駿忠靖伯陳
輝標下總兵楊富水師數十艘出海聽馬得功調度十
二日俱次潯尾李率泰屯漳州遣漳澄水師兼陸路官
兵亦於十二日同海澄公黃梧中路總兵王之鼎俱馳
至嵩嶼海口海舟俱撤回廈門止以數十舟游徼海而
靖南王耿繼茂大集兵丁快船及同安水師大小戰船
總督李率泰別遣一軍奪鼓浪嶼屯北架礮整兵渡海

刻期二十一日水陸四路官兵齊攻廈門飛檄圍頭水師二十一日子時開洋至廈門白石頭會師十八日夾版船八艘先泊金門外港十九日馬得功親統各路水師大小四百艘夾版船七隻漂至金門烏沙頭偽提督黃廷等揮巨艦百餘迎戰我兵首尾相應協力攻打海兵大敗鄭鳴駿陳輝陳一明等犁沈賊舟三奪獲大舟二斬首三百生擒四十餘礮傷溺死無算楊富礮擊偽總兵謝福船折其桅過船殺賊二百人生擒十八人陸安水師游擊鄭洪中軍守備孔應賢獲鳥船一趕贈船

靖海志卷三

二水底艙二殺賊八十餘餘皆跳水死二十日晨鄭經率周全斌黃廷等親督巨艦蜂湧挑戰馬得功揮夾版船揚帆出禦大礮疊發打碎賊舟數艘是日礮聲如擂鼓從辰至酉相續不絕不啻如雷聲霹靂鄭經見夷船多礮衆寡不敵乘潮漸漸退出浯嶼屯廈門港周全斌等十三號船在後迫於潮長不得出遂直遶我船之後衝大鯨而入荷蘭國兵礮矢齊發無一中者馬得功坐鳴駿中軍船全斌誤以為鳴駿也直前攻之黃廷中軍將吳朝宰鄭經親軍將蕭乘龍前後夾攻揮兵過船得

功親隨鐵甲精兵三百人皆被赦下水得功頓足自投
水而死再攻楊富一船焚之楊富投水遇小艇救之得
免所遇之船多被攻沒我兵大小戰船齊起碇揚帆竭
力應援死戰打傷賊船數艘全斌不知馬得功之死也
乃引去耿繼茂屯潯尾慮賊尾我之後哭犯潯尾令潯
擊范維杰以千人扼高崎海口副將李之珍以千人扼
潯尾海口兩岸俱設大礮大營仍扎潯尾嵩嶼繼茂令
王大用徐成功夏有功江元勳等同擺牙喇恭領徐文
耀王蟒漢恭領馬九玉阿達哈哈番張元德田養民拜

靖海志卷三

塔喇布勒哈看王梅噶卜什章京朱懷德吳效忠副將
馬化麒游擊郭文可史定國牛虎等統擺牙喇蒙古步
騎官兵四千及同安總兵黃翼與場富副將辛球等銜
救夜渡李率泰亦發標下游擊謝四海澄公標下副將
吳淑游擊戴亮總兵蔡祿郭義等合營夜渡兩路官兵
同登鄭經不能拒二十一日寅時直搗廈門中安山長
驅度嶺向城下竹蘭出海王統夾版船抵大擔板海面
率泰令提督施琅統督標參將涂登第公標總兵魏茂
曾合蔡祿郭義柯義林祖奇並進繼發同安水師總

兵杜永和俱出鼓浪嶼率泰選輕捷礮船五十為前鋒發礮擊賊賊屯教場分布抵敵忽見步騎大兵蔽嶺下驚潰奔舟不及者竄伏山間我師環布海岸策應舟師擊賊鄭經披靡退屯浯嶼我師以礮火擊之經船退泊浯嶼之外尚有大船七八百小者亡算耿繼茂發藩標督標并延建邵三府兵焚勸山峒餘寇復令提督施琅領漳泉兩路水師同鄭鳴駿陳輝楊富等會合夾版船二十四日直抵浯嶼賊來船宵遁黃廷議欲再數日日周全斌以為船多被夷礮打壞不如退屯銅山南嶼遂

棄廈門金門兩島而去先是李總督出示準島中百姓
入界思明州知州黃而輝各鄭經準島民渡海下令三
日而陳永華復召鄭經禁之至是大兵入島盡將廈門
金門城垣房屋焚燬遺民尚數十萬多遣兵及男婦係
繫童稚成羣若驅犬羊連日不絕而投誠兵所至搜掠
財物發掘冢墓至割建國公鄭彩之棺而殘其屍墮城
焚屋斬父樹木遂空其地而嘉禾斷人種之誠應焉
十二月兵部差郎中紀振疆筆帖式布蘭碩賞福建將
士靖南王耿繼茂奏鄭成功在臺灣因其子鄭經擁

兵抗拒驟發顛狂於五月初八日齧齒身死 鄭經在
銅山人心離散營鎮多叛而廈門金門之舊將殘兵官
員紳士無船可泛海者或於誠或逃遁流離失所死亡
殆盡矣

甲辰康熙三年

正月十三日兵部奉

上諭鄭芝豹母在福建投誠爾即部傳諭芝豹念豹母
投誠寬其罪即行釋放安插歸旗居住 鄭經駐銅山
諸軍乏糧周全斌欲襲洪旭而并其船洪旭亦防之值

海風大作船各飄開全斌遂率其衆入漳投誠後封承
恩伯而洪旭以杜輝守南澳輝亦掠其輜重投誠二
月授海島投誠將士阮美鄭繩安左都督鄧嘉玉阮驊
右都督焦華岳都督同知林鸞陳大興杜卿王鼎勲高
捷李隆陳志義阮復曾林朝展張太都督僉事福寧
總兵吳萬福報偽逆阮春雷據長腰東蚶外島阻海為
巢浙寇張煌言近復與之合船福寧向無水師艱於航
海臣萬福招撫偽鎮林國傑等兵丁船隻我兵借以利
濟一時水陸並進分頭夾勦禽斬賊將焚其巢穴積年

負國之氣殄滅無遺煌言春雷僅以身免陣擒偽將所
定江春王尊等解赴軍前正法 靖南王耿繼茂疏報
大捷奉

旨阮春雷張煌言竊據長腰束蚶等島合夥狂逆官兵
奮勇擒斬賊將奪獲船隻焚燬賊巢偽鎮林國標斬煌
言弟張嘉言殺兵奪船帶領家口投誠身雖負傷奮勇
自效以所帶兵船同官兵搗賊巢穴克奏膚功深可嘉
尚與尋常投誠不同著從優議叙 三月鄭經同馮錫
範陳永華等率餘眾回東寧工官馮澄世一船為其家

丁所迫自投海中死洪旭以二十舟候黃廷同行時黃廷部下兵將多不欲行議欲使其子而輝壻吳朝率眾投誠而自已帶家眷與洪旭往東寧適黃梧遣陳克竣來招降黃廷遂入漳投誠後封慕義伯洪旭獨往東寧七月寧波水師左路協鎮常塘報本月投誠效

用將孫惟法等於普陀山先遣兵丁扮作僧人擒獲偽兵部張煌言銀印一顆銅印九顆并伴黨人等二十六日差官二十員啟送到省二十七日部院題廷臣於公衙門見煌言問處處相節歸順因何不從煌言答我已

立意出家為僧不願再用今被擒悉為民笑罵惟求速死部院言既係謀臣我朝必有重用既立意為僧何不先繳勅印煌言不答九月四日言不食病不死在杭日賦詩見志并賦滿江紅尋詞人多傳誦之初七日奉

旨腰斬煌言於市煌言角巾朱履葛袍從容就俘投誠將士請收葬煌言趙廷臣不許子張奇觀鎮海大將軍劉之源收為養子年十餘歲亦奉

旨見赦 七月十九日內大臣會議以福建水師提督施琅為靖海大將軍以承恩伯周全斌為副同慕伯仁

陳輝等合營往剿臺灣差內院他亦哈哈番奈松尼兵
部筆帖式放愷齋勅諭一道銀印一顆往福建商議軍
機靖南王耿繼茂奏荷蘭出海王於八月十六日帶
番船十隻番兵一千抵閩安鎮外臣等會同延請至公
衙門優禮款待約定九月二十日邊開駕至團頭取齊於
十月初旬往澎湖攻打賊巢候風便進取臺灣理合奏
聞

乙巳康熙四年

四月靖海將軍施琅等出洋水至澎湖颶風大作各

船飄散不能相顧皆引還未幾召施琅入京加伯銜為
內大臣歸旗其餘降將亦多以協鎮副叅游守補用
丙午康熙五年

丁未康熙六年

部議分撥海上投誠兵移駐外省先撥慕義伯黃廷駐
河南鄧州隨召承恩伯周全球入京遵義侯鄭鳴駿病
故其子續成襲侯慕恩伯鄭繼緒病故其子修典襲伯
皆召入京歸旂其標下兵及別鎮兵各給行糧分駐於
浙江江南江西湖廣河南山東山西四川諸省屯墾荒

田給其牛種免其六年租稅將領或督鑿或撥在督撫提鎮等衙門効勞文官赴部候補

戊申康熙七年

己酉康熙八年

鄭經在東寧以陳永華理國政馮錫範管侍衛劉國軒管鎮兵忠振伯洪旭病故其子洪磊及永華之姪陳繩武等皆任用鄭經改天興萬年二縣為州置鳳山諸羅二縣課耕種通魚鹽安撫土番貿易外國向之憚行者今喜為樂土焉浙江投誠將都督僉事孔元璋請

往臺灣招撫朝議遣兵部尚書明珠侍郎蔡毓榮至泉州議款明珠遣加卿銜興化府知府慕天顏與孔元璋同渡海至臺灣往議鄭經款稿甚盛請通市封貢如高麗冠帶不雜髮遣柯平葉亨到泉州同議明珠留其使不遣再遣天顏入臺灣申前命必雜髮如內郡經怒折辱使臣困苦之以留使為辭將發兵擾閩地明珠命歸其使款議遂絕而數年之間海上亦相安無事

靖海志卷四

上海李延昱辰山氏補編

庚戌康熙九年

辛亥康熙十年

壬子康熙十一年

癸丑康熙十二年

十一月平西王吳三桂據雲南四川貴州以叛遂陷湖南岳州諸郡縣稱大周元年初平南王尚可喜疏請歸老遼東而留其子安達公之信襲鎮廣東朝議許之并

令舉家歸旂平西靖南相繼疏請俱報可至是平西反
乃命平南靖南仍留駐鎮時耿繼茂已死耿精忠襲王
三王交通逆命雖復停留而反謀益決

甲寅康熙十三年

三月十五日耿精忠據福建傳各官入府議事伏甲執
總督范承謨巡撫劉秉政以叛知府王之儀建寧同知
喻三畏走出被殺范承謨被拘以劉秉政為偽統制使
鄉宦蕭震為偽布政司自稱總統兵馬上將軍移檄各
府州縣俱望風而降 十九日耿精忠檄至泉州提督

王進功是夜縱諸將焚燒南街西街樵樓殺掠到晚紳
庶無遺傳檄各屬縣皆降興化鎮馬惟興叔興化守備
郭維藩叔忠安獨同安城一張學堯晉江水師營李尚
文所部無犯耿精忠再遣逆事黃鏞至臺灣初耿精忠
將拒命遣鏞通鄭經請師為聲援至是又遣鏞見鄭經
請以舟師由海上出江南而已統陸師出浙江鏞回言
海上船不滿百兵不滿萬精忠始輕之耿精忠以黃
梧為偽平和公梧病疽受印不數日疽壞而死其子黃
芳度襲封管其兵駐漳海道陳啓泰黨於范承謨與

精忠有隙聞變先殺家屬十餘人乃自縊陳爲官則甚
貧於死則甚烈漳浦鎮劉文海澄鎮趙得勝俱降耿
福寧鎮吳萬福貪刻失將士心謀拒耿衆不從耿精忠
遣偽都尉曾養性督兵至萬福出降養性誘殺之并其
兵遂乘勝長驅至平陽總鎮蔡朝佐降溫處二府望風
皆下四月潮州總鎮劉進忠降耿密請師耿令劉步
率兵會之反攻同感績順公尤瑞并其兵稍忠召王進
功至福州留之徵其兵鄭經遣協理禮官柯平至福
州報命時耿聲勢已振謾應曰卽世藩來甚善但兵多

餉少各分地自戰可也。由是兵端遂起。鄭經親軍侍衛
馮錫範將劉國軒率舟師數十兵數千先至廈門。
耿精忠檄諸路兵出關黃方度遣黃翼領兵十人應命。
趙得勝不從。與馮錫範陰約以海澄歸命於鄭經。隨將
兵進取同安。王進功之入福州也。耿精忠調張學堯克鎮
泉州。以化尚蘭代守同安。鄭經兵至尚蘭迎降。獲學堯。
家春學堯聞變趨回施福引之俱降鄭經。五月鄭經
至思明州。以趙得勝為左提督。封興明伯。張學堯為左
先鋒。鎮化尚蘭為仁武鎮。遣人至精忠處議撥地方安

擇船隻兵丁精忠不吝又采買竹木麻繩修船等物遂

成仇隙至是耿精忠聞同安之失乃遣王進率步卒十

人入鎮泉州

王進號王老虎原任漳州副將

時提督五營兵將不肯應

調王進至與城守賴玉相結納用提標守備戴國用為

爪牙勅王進功家眷入省耿精忠復遣兵接應兵將至

進功之子藩錫與其屬楊青等議先發以制之 六月

初一日王藩錫以提督夫人之命召諸將議事誘賴玉

戴國用李尚文等執之率兵攻王進進走登金門樓意

氣自若提標兵散而無統帥相持至晚不決進恐海船

至更深整隊出城西去 初三日藩錫等殺賴王分其屍 初四日絞殺戴國用釋李尚文迎鄭經入城鄭經以藩錫為指揮使暫理提叔軍務 黃芳度襲殺漳州城守劉豹豹耿氏所署也鄭經遣人諭之芳度遂降封德化公授前提督漳屬錢糧聽其徵給芳度終不自安遣人間道齎密疏入京 七月平南王尚可喜遣兵圍劉進忠於潮州耿精忠不能救進忠納款於海上鄭經遣援剿鎮金漢臣率舟師援之以進忠為右提督封定虜伯 九月耿精忠以步騎二萬遣漳浦新降總兵劉

炎同王進攻泉州鼓行至惠安肆行焚掠鄭經命劉國軒督諸鎮并統五營兵梁之對壘逾旬進退屯楓亭列營二十餘里十月國軒兵至塗嶺嚴陣會戰王進見前陣皆新募之兵直前奮擊之兵皆懼法死戰國軒令許耀分兵襲其後焚其營壘進兵大敗國軒追至興化城外三日夜而還十一月偽周吳三桂遣禮曹錢鼎聘於海值鄭耿交惡曰報復遣禮曹員外周文驥至海和解劉炎在漳浦不降鄭經密請援於耿逆耿遣兵會之至平和鄭經徵黃芳度擊走之耿逆復遣其親

軍都尉徐鴻弼從間道入漳浦鄭經以馮錫範趙得勝督諸軍攻之徐鴻弼劉炎會雲霄鎮劉成龍合兵迎戰於羅山嶺右虎衛何祐揮一擊之鴻弼等大敗走回城馮錫範以紅夷大礮擊入城中劉炎等大懼同鴻弼成龍俱出降 十二月趙得勝督諸軍援潮州與平南王兵戰於黃岡大破走之潮圍始解初進忠被圍金漢臣一軍殲焉進忠極力守禦將及半載至是廣兵燒營而遁 鄭經分設六官名曰協理洪磊為吏官楊英為戶官鄭斌為禮官柯平為刑官楊炎為工官兵官缺置六

靖海志卷四

科都事都吏察言司承宣司賓客司等陳永華為總制

留守兼管勇衛馮錫範為侍衛

二開
一軍

薛進思為左武

衛劉國軒為右武衛何祐為左虎衛以施福為五軍其

左右先鋒及諸鎮營皆聽五提督調遣凡文武事宜皆

贊畫叅軍陳繩武侍衛馮錫範主之初鄭經之來思明

州也兵糧取給於東寧洪磊承其父洪旭遺命助餉銀

十萬兩至是兵衆餉乏轉運不給乃以六官督比紳士

富民以充之以鄭省英為宣慰使總理各府州縣錢糧

百姓年十六以上六十以下每人月納銀五分名曰屯

丁船計丈尺納稅名曰梁頭特設各府鹽司分管鹽場以給兵食

乙卯康熙十四年

正月耿賊遣張文翰至鄭賀正議和送船五隻鄭經遣禮官鄭斌報之約以楓亭為界自是鄭耿交好二月永春馬跳岑寨民呂華不服鄭氏徵派薛進思圍之三月月不下知縣鄭時英諭之出降釘殺之家族發淡水充軍續順公沈瑞駐饒平劉進忠攻之不克廣兵來援何祐遇之於百子橋破走之瑞出降改封懷安侯流

洪經畧承時胞姪士昌天恩天倫及春口於東寧之狼
嶠從公論也流前進士楊明琅及春口於狼嶠以其過
崇禎帝梓宮不下馬又修南安縣志以海上爲海寇也
後皆死於流所知南安縣事劉祐有云洪經畧未必盡
是鄭國姓未必盡非鄭經悅其言召之已逃回籍矣
五月劉進忠請海師南下鄭經許之初六日鄭經入海
澄遣鄭斌入漳慰諭黃芳度或來兵入見或統兵隨征
芳度終不從命密調回黃翼出開之兵狀逆移檄召之
亦以疾辭鄭經遂定之計之計 劉國軒率諸鎮兵至

潮與進忠規取屬縣之未附者安達公尚之信悉力守
禦相持日久糧乏兵病之信調兵十餘萬盡銳來攻國
軒自新墟寨一日一夜退二營母山以餘糧露載車上
宣慰使洪磊懸金以賞有功軍心始定進忠與國軒議
曰之信大兵必從小路而來出我不意須得勁將當之
惟吳祐可任然不可言其故恐其心怯子可嚴陣以待
而余將騎兵背城以為應援國軒從之是夜見敵營從
大路火光照耀進忠發大礮擊之見火光不動進忠曰
是空營也我兵可安寢以待次日之信率兵從小路而

來何祐見大陽突至欲退不可冒死直前奮勇擊之無
不以一當百之信大敗走國軒等窮日夜追之殺死不
計其數是役也祐以饑卒數千破敵兵數萬由是何祐
之名大振粵東祐號別何錐子 六月鄭經自海澄移
檄萬松關黃芳度令其下俱難髮率兵拒守不降遣其
兄芳泰突圍入粵請援鄭經進攻不利援剿後鎮萬家
雲梯登城中歾死鄭經亟築長圍以困之調何祐從潮
州先攻平和縣守將賴陞降諸屬縣皆下 十月海澄
公標將吳淑以漳州降於鄭經初淑投誠屬公標黃德

待之厚將死呼淑托曰吾兒年少君可保全之及城被圍日久淑謂其弟潛曰我本鄭氏降將公雖待我厚我負罪于先藩賢深今世藩待我眷族恩尤加重豈可反圖逆命遂以初六日開城出降鄭經兵入芳度倉皇投開元寺井而死獲其將黃翼蔡龍朱武張濟戴麟陳驪黃培等皆斬之沒其家剖黃梧棺戮尸斬首并芳度首揭以徇衆有議發梧祖塋者鄭經曰罪止其身與先死者何預不許後朝命贈芳度為忠勇王時芳泰往粵求援會其兄芳世由汀州至永定亦以是日破永定縣

靖海志卷四

聞漳州陷迺大掠而遁鄭經以吳淑為後提督吳潛為
戎旗二鎮十一月鄭經令龔淳往日本取回鄭泰所
寄之銀淳乃泰委寄之人并執有收票可據先是兩家
紛爭日本王皆不肯與至是番人皆混開支銷銀凡四
十五萬僅得二十六萬而回

丙辰康熙十五年

正月鄭經以右虎衛許耀前衝鎮洪羽等率師會直潮
諸將攻取廣東州郡二月平南王昏病日甚會偽周
師克肇慶韶州等處廣州人人自危駐韶諸軍聞報燒

營而遁劉國軒劉進忠何祐等分南北兩路而進碣石
鎮苗之秀軍程鄉其妻在汎遣人迎降仍勸之秀納款
鄭經許其回鎮碣石國軒等水陸並進圍惠州攻博羅
不下旋下長樂新安龍門等縣之信窮蹙遂乞降於三
桂三桂封之信為轉德公檄讓惠州於經之信檄提督
嚴明撤守兵回廣遣使餽弓馬幣帛通好於鄭氏鄭經
廼以國軒鎮惠州東莞守將張國勛亦降鄭經經以為
後勁鎮自是鄭與吳分界而守 五月耿逆調汀州鎮
劉應麟兵出關應麟不從密通款於鄭經經乃遣吳淑

統兵馳書於精忠言欲假道汀州以出江右耿賊遣兵防城應麟懼其圖已率所部出掠瑞金石城吳淑兵至應麟與之合兵共攻汀州遂下之鄭經以應麟為前提督七月鄭經調劉進忠出師進忠稱疾不行進忠自潮州定後來見鄭經待之禮意殊畧見左右用事者皆錄錄知不足與有為及取汀州歎為失計至興寧與諸將不協流言日起遂稱病回潮陰為自守之計九月耿賊師出浙江者為總督李之芳所扼多被摧敗朝命遣康親王提兵乘機入閩耿賊兵出江西者總督蔡

毓榮及滿洲兵移駐兵合力拒之耿兵大敗廣信遂失
既而棄建昌不守大勢已潰又聞汀州已破耿賊益憂
內顧諸將遂密謀詐作耿賊投誠獻開耿賊聞變大懼
收王進范承謨蕭震絞殺之欲乘船奔海為都尉徐文
耀所脅不得出城遣王進功回泉取救兵詔囑曰我忍
死以待也然廷建已失不得已於十九日薙髮迎康親
王入福州後耿賊入京與徐文耀及諸將領皆伏誅與
化守將馬成龍以城降於鄭氏鄭經令許耀率兵赴之
十月鄭經令許耀督諸軍進取福州駐師烏龍江許

權驕縱諸將不服飲酒嬉戲不知軍事 大兵渡江有

議於半渡擊之不聽既登岸倉皇出戰前鋒死鬪不能
分兵救援及少却又不殿後引兵先走委棄輜重器械
不可勝計鄭經乃遣趙得勝何祐屯興化以代之 耿
賊檄曹養性等自溫州航海回閩朱天貴以舟師降於
鄭氏其餘逃入福州鄭經遣奇兵鎮黃應選擊之獲巨
船數十艘 十一月精忠邵武守將楊德猷歿於吳淞
淞入據之始請盟 十二月大兵至邵武吳淞禦之時
大雪嚴寒諸軍冒雪涉溪拒戰皆大凍不能支遂棄邵

武退劉汀州大兵進至建寧縣薛進恩守汀聞之驚懼
失措劉應麟願傾資餉兵困守進恩猜疑不從棄城而
走應麟奔潮州依劉進忠終憤病死 平南王尚可喜
於九月病故之信遣使報訃并請其妹奔喪林沈瑞叔
母也鄭經許之并遣使弔喪偽周封之信為轉德親王
丁巳康熙十六年

正月大兵至興化時鄭軍銳氣已喪何祐又與趙得勝
不睦疑其納款於我戰敗不救得勝死之何祐奔回泉
州 二月初九日大兵至泉州鄭氏守將林定無備城

陷標將林孟恭宿營衛貴死之林定素與民相安逃於

民間削髮走免諸軍潰散 十九日大兵至漳州鄭經

倉皇登舟至海澄棄而不守至廈門欲回東寧百姓號

哭攀留角宿營吳桂整兵防守衆賴以安繼而餘衆稍

集地遠水師防衛分汎而守 鄭經祭趙得勝親臨哭

之斬薛進思原姓名許汝綢貢耀病痢不數日死何祐

興淑戴罪自効 鄭經遣諸將家眷撤回東寧王進功

沈瑞張學克等陸續起程劉炎以母老病至外洋勒兵

劫船乘風下碇石所依苗之秀後投誠至京流徙寧古

塔 三月鄭氏諸將退集思明州時兵餉不給廼分汎
南北地方措餉召募以前虎衛林陞水師樓船中鎮蕭
琛等駐晉南及定海福寧一帶地方以後提督吳淑揚
威前鎮陳昌戎旗一鎮林應竒兵鎮黃應等駐同安至
揭陽潮陽一帶地方 漳浦丞者朱寅挾左道詭稱朱
三太子聚集海上殘兵二百餘人於十九夜襲泉州攀
堞而上鳴鼓揚旗從開元寺前至西街守兵以爲海師
復至廼於雙門前發一大礮寅廼抽回出城而去人以
爲神附者日衆屢戰皆勝蔓延於漳泉屬縣凡深山窮

谷巖寨無所不到派糧以食頭裹白布時人謂之白頭賊六月劉進忠擁兵觀望鄭經遣戶官至潮徵餉不應買運又閉糴獻款於偽周尋歸王朝磔死燕市劉國軒在惠州尚之信既歸命孤城難守鄭經遣水師迎之廼率所部航海而歸朝命以黃芳世襲封海澄公授汀漳總鎮公標守將黃藍授海澄總鎮芳世請兼水師提督許之芳世至閩驕傲專用北兵人心不附三桂將韓大任據守吉安大兵圍之經年無援廼造小舟於城內乘夜以繩引舟截江渡兵潰圍走入閩界欲下

海有信通於鄭氏 十月鄭經遣何祐等至南靖小溪

收兵吳淑等至長泰北天成寨以通應之大任竟以糧

盡就閩省投誠後歸所旋從大兵征 十二月大兵圍吳

淑於天成寨朱寅率衆來援吳淑廼突圍而出 康親

王遣漳泉二知府同泉紳黃志美等照朝鮮例與鄭氏

議和鄭經不從亦無報使

戊午康熙十七年

正月泉州提標兵巡界駐日湖鄭氏水師四營陳陞擊
之大為所敗標兵乘勝侵掠東石等處 二月鄭經以

劉國軒為中提督總督諸軍後提督吳淑為副初十日
國軒督軍至海澄攻玉州我守將劉宗降徇三汊河福
許皆下十八日進取江東橋我守將王重祿呂翰等奔
潰遂燒斷橋梁以絕漳泉大路漳州援兵至國軒分兵
擊敗之三戰三捷軍聲大振二十三日取石碼獲我守
將劉符楊朝宗遂軍於祖山頭以逼海澄我副都統孟
安等自潮來援國軒退屯石碼築垣拒守仍分兵屯漳
州郭外我提督段應舉自泉州來寧海將軍喇哈達自
福州至平南將軍賴哈自潮州來先後應援國軒倏水

倏陸我滿漢諸軍疲於奔命 三月初一日國軒列陣
郡東赤嶺我兵背城迎戰鄭氏前虎衛林陞一軍當其
鋒殺傷相當朱寅統兵扎天寶山以牽漳兵之勢黃芳
世擊敗之寅遁入長泰 國軒樹柵雙橋一帶離漳數
里滿漢諸軍會議以一股同黃芳世扎水山頭灣腰封
一股扎鎮門安礮以斷其往來水路國軒偵知十一日
黎明焚營撤兵漳兵意其遁也少頃舉帆直抵水頭登
岸涉領進城芳世素不知兵入與滿將不協吳淑攻之
戰敗墜馬遇救得免走入漳病城月餘死自水頭之敗

海澄餉道阻絕段應舉會綠旗兵及滿洲將軍滿兵數
萬列營祖山頭十八日午刻國軒兵至應舉揮兵迎敵
何祐少却江勝吳淑等繞出祖山頭之外國軒督勁卒
登山直衝滿漢兵滿漢兵敗走衆大潰國軒又以疑兵
截漳州大路滿漢兵棄輜重自相蹂踐奔入海澄國軒
連夜令軍士鑿塹一人一尺引江水環城圍之外又鑿
溝數里沿堤兩岸安礮守之由是內外阻絕 是月吳
三桂以初三日稱帝於衡州國號偽周僭元昭武 四
月朝命召總督卽廷佐入京以布政司姚啓聖代之勒

巡撫楊熙致仕以按察司吳興祚代之調江南提督楊捷代段應舉援兵四集屯筆架山以救海澄五月劉國軒以筆架山南小寨懸崖狀如掛燈俗呼燈火寨下臨大溪順流可通海澄問誰可扼守吳淑請行來夜率兵進寨天明寨柵完備初十日滿兵發礮攻擊連夜不絕淑令軍士穴地藏身無死傷者馳報國軒以為乘夜發礮意不在寨當列別之信至滿漢兵齊至振祖山岳崩破林標張鳳二營鳳戰死又進攻林陞營國軒援兵至姚啓聖之子姚儀統韓大任降兵以牛載土囊填溝

至第三重國軒發大礮齊擊之死者無數滿漢騎兵多
填於塹邊退去時京中上諭有能救海澄及城中兵
將有能拔圍而出者皆重賞奈國軒鑿塹通潮圍至數
重不可復救矣六月初十日國軒攻海澄陷之殷應
舉穆伯希佛自縊死黃藍不知所終獲孟安馬鹿等滿
漢官三十餘員皆釋之校衛給俸滿兵十餘遷之東寧
時城中滿甲二千馬八十餘匹綠旗城守兵計二萬餘
圍八十三日糧盡殺馬而食馬盡屑馬骨食之死亡及
泗水而出者過丰閩省震恐諸援兵退守漳郡朱寅下

海封為蕩虜將軍改名蔡明義歲餘病死國軒議乘虛
攻泉州吳淑分兵下長泰縣國軒兵至同安都統雅大
里走回泉州擒鄉兵總黃朝光斬之與何祐江欽楊德
數十騎離隊伍先行至泉城循清源山至東嶽相視營
地城中兵不敢出久之隊伍始至扎空營於平地城中
兵終不敢出七月國軒水陸並進江欽攻南安殺守將
諸縣守兵相繼棄城走遂取南門橋銃城載龍煩及大
銃數十號攻南門城崩壞四十餘丈盡為平地地城內
再築短牆以守我城守馬勝等以釘釘衣船板鋪於地

上兵入城無蹕足處損傷甚多會天大雨城竟不拔
鄭兵圍泉兩月援兵四集將軍喇哈達從漳平間道出
安溪巡撫吳興祚同浙江提督石某由鵝嶺出永春提
督楊捷由廣橋進河市三路會師至南安皆未敢向前
將軍又調水師林賢黃錫等出閩安鎮逆為聲援八
月鄭氏水師鎮總督蕭琛守定海林賢等舟師至琛戰
戰船不先期整頓議以舟寡且小欲據上流牽制之水
師五鎮章元鎮欲先發制人率所部十舟進戰林賢等
擊之元鎮衆寡不敵阻風逐流一軍盡沒被擒入福省

殺之蕭琛不防備遇敵大潰退泊海山遂妄報福州水
師大至鄭經遂令劉國軒退兵以守思明州軒於二十
四日退兵下船隔三日城中兵始敢出鄭經召回蕭琛
斬之以援勦左鎮陳諒後鎮陳起明督朱天貴等水師
防禦北船偽周主吳三桂病死衡州孫世璠僭立其
姪應奇守岳州驕而貪大兵攻之棄岳州遁回於是湖
南雲貴皆不守遂亡九月劉國軒入江東橋至長泰
滿漢兵遇之皆披靡乘勝長驅至耿精忠營衝之馬中
斃掀國軒墜地有滿洲披甲前蒙國軒釋放遇之以已

騎授國軒始走免滿洲主將詢知怒而殺之國軒出江
東守三汊河列營觀音山與滿漢諸軍營壘相望十
月時鄭氏漳泉縣屬盡棄惟據守海澄姚啓聖等難於
復命乃遣人至海議息兵安民意欲得海澄也鄭經竟
不從十二月再議遷界中寅之變閩省遷民志復故
土丙辰八閩已復康親王疏請遷界累民罷之至是督
撫請再遷從之

己未康熙十八年

正月時雖設界而海汎往來內地派糧如故朝議上自

福寧下及詔安三十里量地險要築小寨屯守兵限以
界牆由是瀕海數千里無復人煙先是鄭氏諭思明州
每月每戶輸米一斗自二月起每戶再加一斗劉國軒
請停文武官俸自出糧餉兵三月從之三月姚啓聖
以果堂寨迫近江東橋欲發兵守之國軒偵知同吳淑
發兵入據其寨漳兵至擊走之鄭經自定海失守以
朱氏貴守海壇陳諒為水師提督於廿九日早各船乘
南風汎發進泊定海福州集船百餘號由五鹿門而出
陳起明朱天貴率煩船衝敵而入擊破十餘船獲大鳥

船一隻值大風暴起福船收入五虎門海船收泊海壇
四月陳永華啓請元子克璽為監國時年十六號曰
監國世孫 六月鄭經命鄭時英駐東石督餉時禁界
鹽賣店人多私來東石販鹽時英獻策欲掘沿海鹽埕
則利盡歸於海鄭經迺徵林陞令楊忠率兵往潯尾掘
南北場鹽埕忠至深泥舍舟登岸發掘兩日夜兵不就
船竿頭守將密請泉城大隊兵至四面合攻忠力戰不
支中礮沒於海餘眾死傷逃亡過半界禁既嚴私販亦
絕 七月國軒蔡潯尾寨一夜而成同安守將兵至潯

走之復築汭洲城由是同港八槳船不敢出 朝命以
萬正色為福建水師提督正色晉江人師誠授叅軍以
四川朝天關之功陞岳州水師總鎮湖南平遠擢是任
八月初耿逆之變漳浦八江機與一豹豹同時聚眾
茶江右依耿逆及大兵克復江西招降不從攻之不從
克據皇禁山攻掠村社至是送款於海鄭經授為征夷
將軍率眾入閩建寧守將劉起龍禦之陣傷敗回而死
機足跛號拐子一豹青年勇壯後投誠俱流寧古塔
九月右武衛林陞汎守東石取給軍餉及楊忠敗死林

陞調兵隨征僅以散卒二百餘人委施廷陳申守寨時
有叛卒入泉城報知城中發滿步數千於廿五日四面
環攻施廷被創陳申戰死寨破兵民赴海死者無數我
朝仍築三寨犄角以守 十月國軒離漳城五里而軍
時援漳滿漢兵共十餘萬國軒兵只有萬餘營壘咫尺
相望指揮自如諸軍畏之如虎國軒以果堂扼要重地
初八日率兵就果堂復版尾地方再築一寨初九日上
未就滿漢將軍提督集兵數萬齊至銃不可當國軒與
吳淑何祐林陞江欽欽江兵不滿二千奮勇死鬪自午

至申衝擊數疊國軒戒依寨且戰且守每次發礮無不
披靡陣斬章京巴石兒等其餘帶傷而遁者以數千計
自是奪氣兵不敢出國軒時縱卒數百人皆持鹿銃間
以鳥鎗渡河衝擊自登土阜據胡牀張蓋而觀之滿漢
兵遇之無不摧破皆堅壁自守不暇又善用間謀敵人
情形纖悉必知時謂之劉怪子姚啓聖遣人至海上
議息兵又說國軒使罷兵就撫國軒吳詞以謝啓聖又
設修來館懸重賞臺灣文武兵將來者次第俱賞銀有
差降者日數百人時諸軍缺糧國軒一切不禁頭領與

兵丁長髮與短髮往來循環而國軒兵額亦不缺 十
一月吳淑守版尾寨大兵築壘環攻礮聲日夜不絕淑
處之晏如身被傷復染病不以為意時值陰雨新築壘
垣多壞揮左右避之自踞牀而卧初八夜二更牆崩礮
死昇至思明鄭經親臨哭之以其次子吳天駒為建威
右鎮統其兵 十二月姚啓聖吳興祚大集舟師攻厦
門題請浙粵水師剋期協攻鄭經調各洋船私船配兵
北上以右武衛林陞為總督左虎衛江勝樓船右鎮
天貴為左右副總督率諸軍禦之

庚申康熙十九年

正月水師提督萬正色及總兵林賢陳賢黃鎬楊嘉瑞督舟師出閩安鎮巡撫吳興祚率兵沿海援之林陞分船三十號守海壇自統船六十號退泊泉州吳塗灣

二月萬提督至海壇海船俱退至泉州迎敵萬提督至圍頭朱天貴以七舟衝其隊所向無前偶海風大作萬提督乘風收各船入泉州港而沿海岸上安設陸師防守鄭氏各船無所取水迺退至金門鄭經所親幸施福密通姚提督欲為內應使投降兵數百人挈眷來歸

乘機欲舉事國軒謀知啓鄭經收殺併及施齊

福即施齊施

將軍環長子

鄭經議欲撥國軒兵三萬配小船直入泉州

港攻萬提督使人持令箭抽兵時兵已乏糧盡皆潰散

國軒禁不能止守海澄陳昌以城投誠國軒至廈門知

勢不可為收拾餘衆下船百姓遮道跪留 二十六日

兵變擄掠百姓鄭經焚演武亭行營盡率將士登舟協

理五軍吳桂收散卒據廈門以待大兵 二十八日萬

提督兵入思明州 二十九日鄭經至澎湖朱天貴舟

泊銅山姚總督招之遂投誠 三月十二日鄭經回臺

東寧 五月東寧地有聲如驢鳴半路店兩電大如雞
子 六月鄭氏總制陳永華晝坐見有衣冠甚偉者自
稱行火使者欲借其衙署約住三月然後去永華設席
張樂饌之與之譚甚久餘人不見也即封衙署借之
偽承天府猶生子四耳三目前二足向上 鄭氏今日
十甲出丁壯一名 七月陳永華病故 十月劉國軒
營中猶生子獸身人面 十一月白氣長數丈見於西
方

辛酉康熙二十年

正月二十八日丑時鄭經卒於臺灣偽承天府行臺

三十日馮錫範劉國軒調兵駐臺灣偽承天府會六官
議立嗣經母董太妃與諸公子收監國印克璽不肯與
擁兵自衛羣議以克璽迺乳母抱養之子非鄭氏出遂
縊殺之妻陳氏永華之女亦自盡 二月初一日董太
妃率世子克塽登位時年十二歲錫範之婿百官朝賀
畢太妃起出位諭所以誅監國故以世子付託馮劉等
俾竭力匡扶涕淚沾襟衆心大慰 董太妃以馮錫範
為忠誠伯劉國軒晉為武平侯

初以海澄功封武平伯至是封侯

大赦

國中 以經第三子聰為輔政公領護衛 三月以經
第五子智為右武驤將軍募兵 四月以經第三子明
為左武驤將軍募兵 臺灣偽承天府火災 五月總
督姚巡撫吳陸提諸水提萬題為報明事本年四月二
十二日據舉人黃金從呈繳偽官傳為霖密稟內開偽
藩於正月廿八日病故三十日縊死其監國長子欽舍
二月初一日立泰舍叔姪相猜文武解體主幼國疑時
不可失等情到臣等又據龍溪縣送到偽官廖康芳稟
稱相同俱與臣等密探相符此迺天亡之時但臺灣孤

懸海外統師遠勦時地難測非臣等所敢擅定會同具
題請旨密示臣等遵奉施行 六月十六日董太妃卒

時協理刑官柯平已病故陳繩武閒住國事錫範主之
兵事國軒主之 八月二十八日中軍營火 九月初

三日塗輕庭火 十月賓客司傅為霖通款事發逃亡
廿八日獲之 十一月初一日誅傅為霖及同謀宣毅

左鎮高壽都吏陳典威盡殺其子弟續順公沈瑞令自

縊家屬入官發配

禮官試之女

總督姚上疏請攻臺灣力

薦內大臣伯施琅可任水師提督萬言臺灣難攻且不

必攻朝命召見施琅仍以靖海將軍充水師提督改萬正色為陸師提督代諸邁

壬戌康熙二十一年

正月施將軍出京至閩於廈門各處調兵整船 劉國軒以銃船十九號戰船六十餘號兵六千人撥諸將守澎湖身往來督戰 五月姚總督率官兵至銅山候風 劉國軒至澎湖臺灣列兵守各港濕 六月姚總督官兵回汎 七月劉國軒歸自澎湖 安平鎮火 施將軍題請專征奉 旨相機進取 十月歲饑 十一

月國軒赴澎湖 十二月臺灣偽承天府火災沿燒一
千六百餘家米價騰貴民不堪命 國軒歸自澎湖

癸亥 康熙二十二年 臺灣稱永歷三十七年

正月馮錫範備兵鹿耳門 二月米價大貴人民饑死

甚多 五月劉國軒率師至澎湖 六月十四日施將

軍自銅山開船大小五百餘號姚總督撥陸兵三千隨

征 十五日到八罩 十六日進攻澎湖國軒列礮尔

巨艦各數十以待諸將士皆望而逡巡惟提標游擊藍

理曹成張勝正黃旗侍衛吳啟爵同安游擊趙邦誠海

壇游擊許吳銅山游擊阮欽為以七船冒險深入麋戰
國軒分兩翼海艘齊出四面合圍我師施將軍琅恐船
船有失自將坐駕衝入內外夾攻敵稍却施將軍遂同
七船隨流而出時天色將晚遂於西嶼頭洋中拋泊
十八日早次於八罩以收諸軍國軒聞而喜曰誰謂施
琅能軍天時地利莫之能識諸軍但飲酒以坐觀其敗
爾遂不設備蓋澎湖自六月數起颶颶無三日晴風而
近澎湖島下有老古石嵯岈若鐵樹剛利無比凡泊舟
下扎遇風起立刻而覆乘船者莫不危之然停泊數日

浪靜風恬亦天幸也 十八日移至虎井施將軍泊小舟於內外塹峙間窺形勢於是再申軍令嚴明賞罰令總兵陳蟒等領船五十號從東畔峙內直入四角山又令總兵董義等領船五十號從西畔峙塹直入牛心灣以為疑兵示以若欲登岸者將軍身率諸鎮將部署大鳥船五十六號居中分為八股排入餘船以次而進以為後援指畫既定俟風而舉 二十二日已刻南風大發南流湧起遂下令揚帆聯進風利舟快瞬息飛駛居上流上風之勢壓攻擣擊無不一當百人有火器火

船乘風縱發煙燭彌天大小海舟二百餘艘燒毀殆盡
國軒見勢覺難支遂乘小舟從北門孔道逸去而全軍
覆沒矣是役也惟前鋒林賢朱天貴二船初入灣澳天
貴倏中礮而死林賢被傷兩箭餘諸軍皆無恙國軒敗
回羣情洶洶魂魄俱奪惟有束手待斃而已於是施將
軍駐師澎湖休勞士卒收拾船隻為進取臺灣之計下
令戮一降卒抵死諸島投戈者數千人皆厚恤之有欲
歸見父母妻子者令小船送之降卒相謂曰軍門恩澤
及我骨肉矣死難報也歸共傳述之臺灣兵民莫不解

體歸心惟恐王師之不早來也 世子克塽與錫範國

軒泣相謂曰民心既散誰與死守浮海而逃又無生計

惟有求撫之著耳於是遣鄭平英林惟榮曾蜚朱紹

熙齋乞撫書表於閏六月初八日至軍前且求聽居臺

灣將軍曰削髮登岸煌煌明旨也何敢不遵且若輩不

親到軍門而遣人代齎書表詐也為緩兵計耳復令曾

蜚朱紹熙回諭之 七月十五日世子復遣馮錫珪陳

夢煒劉國昌馮錫範韓同曾蜚朱紹熙再至軍前一遵

嚴令焉 故明寧靖王術桂袞冕拜告祖宗從容投繯

死 施將軍令侍衛吳啓爵及筆帖式常在同馮錫範
等前往臺灣宣布德意且密察臺灣虛實情形吳啓爵
於七月十九夜再至安平鎮翌日見世子克塽謂之曰
足下遠居島嶼原與三王不同三王謂吳與耿尚也三王國家叛
臣也罪在不貲足下三世仗義於海濱亦人之所難也
今若嚮化歸德使海宇廓清朝廷必有格外殊恩當不
失爵祿也克塽曰侍君惠及宗祏敢不唯命是聽啓爵
見國軒曰澎湖之役天也非人也君雖挫衄以歸而雄
邁之風不衰島上英傑惟君一人耳然所謂英傑者在

識時務今大師臨門或戰或降決之一心足矣何必遷延觀望致悞大計乎國軒曰天威遠震波臣革面誰敢復有貳心侍君但安坐以待必得契約以報軍門也蓋臺灣世子年幼內政馮錫範主之外政劉國軒主之錫範庸懦監子進退無據故相持未決焉侍衛復謂國軒曰築舍之謀終無成日君但令兵民遵制雜髮則大事可定矣國軒白謹奉教遂下令兵民雜髮錫範亦遂與世子連綴冊印而舉國歸降焉侍衛回報將軍將軍喜曰不待勞師而傾國輸誠朝廷之福也即令侍衛馳驛

入奏并繳歸誠冊印 九月初一日侍衛至京朝廷召見特加慰勞因問澎湖克捷事情侍衛披圖指畫備言渡海艱難藍理等冒險進攻凡兩舉而後得之又言諸將士竭力用命摧鋒血戰之苦朝廷為之揮淚因諭部臣曰閩師遠出海疆冒險勦寇非渙黔陸地可比論功再加一等朝廷又問臺灣事對曰臣至其地視偽幼主未諳事國事盡委施馮錫範劉國軒錫範懦而無斷低徊猶豫其實無能為也劉國軒傾心歸命挾以必從之勢故臣得畢事而歸又問臺灣形勢侍衛條對甚悉問

提督重兵入險得無有慮否對曰臺灣兵既敗之後莫
與共命者但恐提督後至

南路為鳳山縣北路為諸羅縣建置既定經畫事竣

十月初六日世子克塽馮錫範劉國軒何祐等併眷口登舟十一月初六日至泉州初七日往福省進京

十二月總督姚啓聖病死克塽至京封為漢軍公

弟克舉準開牛录叔鄭聰等俱以三品五品官食俸隨
旗馮錫範劉國軒俱封伯國軒隨補天津衛總兵其子
準開牛录鄭氏自丁亥年起至癸亥年亡共三世共
三十七年